

四庫全書

史部

欽定四庫全書

史部

文獻通考卷二百一

詳校官內閣學士臣瑞保

編修臣程嘉謨覆勘

覆校官中書臣孫希旦

校對官中書臣王彛憲

謄錄監生臣戴祖臯

欽定四庫全書

文獻通考卷二百一

鄱陽馬端臨貴與著

經籍考二十八

史 故事各門總 故事

隋經籍志曰古者朝廷之政發號施令百司奉之藏於官府各修其職守而弗忘春秋傳曰吾視諸故府則其事也周官御史掌治朝之法太史掌萬民之約

契與質劑以逆邦國之治然則百司庶府各藏其事
太史之職又總而掌之漢時蕭何定律令張蒼制章
程叔孫通定儀法條流派別制度漸廣晉初甲令已
下至九百餘卷晉武帝命車騎將軍賈充博引羣儒
刪采其要增律十篇其餘不足經遠者為法令施行
制度者為令品式章程者為故事各還其官府縉紳
之士撰而錄之遂成篇卷然亦隋代遺失今據其見
存謂之舊事篇

宋三朝藝文志曰西漢有掌故之吏以主故事則名之所起不其遠乎魏相為丞相務在奉行故事孔光領樞機亦守法度修故事耳然則師古之學當世之要務隋唐載故事數十家皆臺閣府署舊制及諸遺風曩跡之事今所存惟二三書又取後之纂類附近者著之

隋志二十五部四百四卷

唐志十七家四十三部四百九十六卷

失名姓二十五家裴矩以下不

著錄十六
家九十卷

宋三朝志十六部八十六卷

宋兩朝志六部六十三卷

宋四朝志六十四部九百二十卷

宋中興志一百七十家一百八十九部一千九百九卷

右故事

隋經籍志曰古之仕者名書於所臣之策各有分職
以相統治周官冢宰掌建邦之六典而御史數凡從

政者然則冢宰總六卿之屬以治其政御史掌其在位名數先後之次焉今漢書百官表列衆職之事記在位之次蓋亦古之制也漢末王隆應劭等以百官表不具乃作漢官解詁漢官儀等書是後相因正史表志無復百僚在官之名矣縉紳之徒或取官曹名品之書撰而錄之別行於世宋齊已後其書益繁而篇卷零疊易為亡散又多瑣細不足可紀故刪其見存可觀者編為職官篇

隋志二十七部三百三十六卷

通計亡書三十六部四百三十三卷

唐志十九家二十六部二百六十二卷

失姓名十家六典以下不著錄

二十九家二

百八十卷

宋三朝志三十四部二百一十三卷

宋兩朝志八部三十二卷

宋四朝志十二部一百三十二卷

宋中興志三十六家四十二部四百一十三卷

右職官

隋經籍志曰刑法者先王所以懲罪惡齊不軌者也
書述唐虞之世五刑有服而夏后氏正刑有五科條
三千周官司寇掌三典以刑邦國司刑掌五刑之法
麗萬民之罪太史又以典法逆於邦國內史執國法
以考政事春秋傳曰在九刑不忘然則刑書之作久
矣蓋藏於官府懼人之知爭端而輕於犯及其末也
肆情越法刑罰僭濫至秦重之以苛虐先王之正刑
滅矣漢初蕭何定律九章其後漸更增益令甲巳下

盈溢架藏晉初賈充杜預刪而定之有律有令有故事梁時又取故事之宜於時者為梁科後齊武帝時又於麟趾殿刪正刑典謂之麟趾格後周太祖又命蘇綽撰大統式隋則律令格式並行自律以下世有改作事在刑法志漢律久亡故事駁議又多零失今錄其見存可觀者編為刑法篇

唐志二十八家六十一部一千四卷

失姓名九家自開元新格以下不著

錄十三家三

百二十三卷

宋三朝志四十三部六百九十四卷

宋兩朝志三十四部三百七十七卷

宋四朝志一百一十二部一萬七千三百卷

宋中興志八十七家九十四部三千九百三十卷

右刑法

隋經籍志曰昔者先王之化民也以五方土地風氣所生剛柔輕重飲食衣服各有其性不可遷變是故疆理天下物其土宜知其利害達其志而通其欲齊

其政而修其教故曰廣谷大川異制人居其間異俗
書錄禹別九州定其山川分其圻界條其物產辨其
貢賦斯之謂也周則夏官司險掌建九州之圖周知
山林川澤之阻達其道路地官誦訓掌方志以詔觀
事以知地俗春官保章以星土辨九州之地所封之
域以觀妖祥秋官職方掌天下之圖地辨四夷八蠻
九貉五戎六狄之人與其財用九穀六畜之數周知
利害辨九州之國使同其貫司徒掌邦之土地之圖

與其人民之教以佐王擾邦國周知九州之域廣輪
之數辨其山林川澤邱陵墳衍原隰之名物及土會
之法然則其事分在衆職而冢宰掌建邦之六典實
總其事太史以典逆冢宰之治其書蓋亦總為史官
之職漢初蕭何得秦圖書故知天下要害後又得山
海經相傳以為夏禹所記武帝時計書既上太史郡
國地志固亦在焉而史遷所記但述河渠而已其後
劉向畧言地域丞相張禹使屬朱貢條記風俗班固

因之作地理志其州國郡縣山川夷險時俗之異經
星之分風氣所生區域之廣戶口之數各有攸叙與
古禹貢周官所記相埒是後載筆之士管窺末學不
能及遠但記州郡之名而已晉世摯虞依禹貢周官
作畿服經其州郡及縣分野封畧事業國邑山陵水
泉鄉亭道里土田民物風俗先賢舊好靡不具悉凡
一百七十卷今亡而學者因其經歷並有紀載然不
能成一家之體齊時陸澄聚一百六十家之說依其

前後遠近編而為部謂之地理書任昉又增陸澄之書八十四家謂之地記陳時顧野王抄撰衆家之言作輿地志隋大業中普詔天下諸郡條其風俗物產地圖上於尚書故隋代有諸郡物產土俗記一百五十一卷區宇圖志一百二十九卷諸州圖經集一百卷其餘記注甚衆今任陸二家所記之內而又別行者各錄在其書之上自餘次之於下以備地理之記焉

隋志一百三十九部一千四百三十二卷

通計亡書合一百四十部

一千四百
二十四卷

唐志六十三家一百六部一千二百九十二卷

失姓名三十一

家李播以下不著錄五十三家九百八十九卷

宋三朝志九十五部二千三百二十九卷

宋兩朝志二十八部一百八十三卷

宋四朝志四十二部六百七十七卷

宋中興志三百二十二家三百三十六部三千四百七

十一卷

右地理

宋中興藝文志前史時令皆入子部農家類惟中興館閣書目別為一類列之史部以諸家之所載不專為農事故也今從之凡十七家十八部一百九十九卷

右時令

隋經籍志曰氏姓之書其所由來遠矣書稱別生分

類傳曰天子建德因生以賜姓周家小史定系世辨
昭穆則亦史之職也秦兼天下剗除舊跡公侯子孫
失其本系漢初得世本叙黃帝以來祖世所出而漢
又有帝王年譜後漢有鄧氏官譜晉世摯虞作族姓
昭穆記十卷齊梁之間其書轉廣後魏遷洛有八氏
十姓咸出帝族又有三十六族則諸國之從魏者九
十二姓世為部落大人者並為河南洛陽人其中國
士人則第其門閥有四海大姓郡姓州姓縣姓及周

太祖入關諸姓子孫有功者並令為其宗長仍撰譜
錄紀其所承又以關內諸州為其本望其鄧氏官譜
及族姓昭穆記晉亂已亡自餘亦多遺失今錄其見
存者以為譜系篇

隋志四十一部三百六十卷

通計亡書合五十三部一千二百八十卷

唐志十七家三十九部一千六百一十七卷

宋三朝志五十三部一百五十四卷

宋兩朝志九部六十二卷

宋四朝志十六部七十九卷

宋中興志五十三家五十九部二百二十三卷

右譜系

隋經籍志曰古者史官既司典籍蓋有目錄以為綱紀體制湮滅不可復知孔子刪書別為之序各陳作者所由韓毛二詩亦皆相類漢時劉向別錄劉歆七畧剖析條流各有其部推尋事跡疑即古之制也自是之後不能辨其流別但記書名而已博覽之士疾

其渾漫故王儉作七志阮孝緒作七錄並皆別行大體雖準向歆而遠不逮矣其先代目錄亦多散亡今總其見存編為目錄篇

隋志三十部二百一十四卷

唐志十九家二十二部四百六卷

失姓名二家毋照以下不著錄十二家一

百五十
四卷

宋三朝志目錄十六部一百四十一卷

宋兩朝志十一部九十二卷

宋四朝志六部三十卷

宋中興志四十六家五十一部五百二十一卷

右目錄

貞觀政要十卷

鼂氏曰唐吳兢撰以唐之極治貞觀為最故采時政之可備勸戒者上之於朝凡四十篇

陳氏曰前題衛尉少卿兼修國史按新舊書列傳兢未嘗為此官而書亦不記歲月但其首稱良相

傳中安陽公中書令河東公亦未詳為何人館閣
書目云神龍中所進當考

翰林盛事一卷

陳氏曰唐剡尉常山張著處晦撰記儒人盛事自
武德中迄於天寶首載張文成七登科者即著之
祖也

衣冠盛事一卷

陳氏曰唐武功蘇特撰

太和辯謗畧三卷

鼂氏曰唐李德裕撰先是唐次錄周秦迄隋忠賢
懼讒謗事德宗覽之不悅後憲宗以為善命令狐
楚等廣之成十卷太和中文盛上之

陳氏曰李德裕以令狐楚所著刪其繁蕪益以唐
事裁成三卷集賢裴潏為之序元和書今不存邯
鄲書目亦止有前五卷

秦傳玉璽譜一卷

陳氏曰題博陵崔逢修協律郎嚴士元重修河東少尹魏德謨潤色

國璽傳一卷 傳國璽記一卷

陳氏曰傳無名氏所記止唐肅宗記稱嚴士元與前大同小異

玉璽雜記一卷

陳氏曰徐景撰乾元元年七月記唐志有徐景玉璽正錄即此書也

楚寶傳一卷

陳氏曰杜確撰肅宗乾元二年楚州尼真如獻寶

事

八寶記一卷

陳氏曰無名氏大觀二年

唐文宗朝備問一卷

陳氏曰不著名氏雜錄唐朝典故

通典二百卷

鼂氏曰唐宰相杜佑撰先是劉秩采經史自黃帝迄天寶末制度沿革廢置論議得失倣周禮六官法為政典三十五篇房琯稱才過劉向佑以為未盡因廣之參以新禮為二百篇以食貨選舉職官禮樂刑法州郡邊防八門分類叙載世推該洽三十六年成書德宗時上之

續通典二百卷

陳氏曰翰林學士承旨大名宋白太素等撰咸平

三年奉詔四年九月書成起唐至德初迄周顯德末王欽若言杜佑通典上下數千載為二百卷而其中四十卷為開元禮今之所載二百餘年亦如前書卷數時論非其重複

國朝通典二百卷

陳氏曰不著名氏或言魏鶴山所為似方草創未成書也凡通典會要前書及館閣書目皆列之類書按通典載古今制度沿革會要專述典故非類

書也

唐會要一百卷

鼂氏曰皇朝王溥撰初唐蘇冕叙高祖至德宗九朝沿革損益之制大中七年詔崔鉉等撰次德宗以來事至宣宗大中之年以續冕書溥又采宣宗以後事共成百卷建隆二年二月奏御詞簡禮備太祖覽而嘉之詔藏於史閣

陳氏曰按唐志蘇冕會要四十卷續會要四十卷

楊紹復等撰崔鉉監修而會要稱杭州刺史蘇弁
與兄冕續國朝故事為是書并聚書至二萬卷次
於集賢芸閣

五代會要三十卷

鼂氏曰皇朝王溥等撰采梁至周典故纂次建隆
初上之

三朝國朝會要一百五十卷

鼂氏曰皇朝章得象天聖中被詔以國朝故事因

革制度編次宋綬馮元李淑王舉正王洙同修得
象監總慶歷四年書成上之

六朝國朝會要三百卷

晁氏曰神宗朝以會要止於慶歷命王珪續之起
於建隆之元迄於熙寧十年通舊書增損成是書
總一十一類八百五十八門其間禮樂政令之大
綱儀物事為之細目有開討論顧無不載文簡事
詳一代之典備矣

節國朝會要十二卷

鼂氏曰皇朝范師道以章得象書繁多節其要以

備檢

續會要三百卷

陳氏曰監修仙井虞允文并甫等上自紹興十年

編修起元豐元年迄靖康之末乾道六年書成

巽岩李氏序畧曰徽宗初詔王覲曾肇續編元豐

至元符尋復詔起治平四年止崇寧五年凡四十

年二書皆弗克成政和末有司獨上帝系后妃吉
禮三類總一百一十卷其書則通章得象王珪所
編稍益以熙寧後事而此三類外皆未遑暇運遭
百六史記放絕光堯壽聖太上皇帝甚憫焉紹興
九年詔館職續編三十一年又降趣旨然闕簡破
牘撥落匪易皇帝陛下纂修洪緒敷時繹思更命
宰臣提舉閱再歲乃克成書斷自神宗之初迄於
靖康之末凡六十年總三百卷分二十一類六百

六十六門竊惟五朝大政前書備載類仍舊章鮮
所開創逮神哲徽欽之御世因時適變道與前異
大抵革於熙寧復於元祐旋革於紹聖又復於元
符再革遂臻崇觀政宣之豐豫以及靖康六十年
間業廣事詳方策所記視前倍蓰今茲綴集於零
落散亡之餘十僅得其六七誠不足允符神旨然
科條粗舉部類各分禮樂兵財之大原儒術刑法
之要指取賢歛才之品式設官分職之制度九州

之別合四夷之服叛槩見於斯凡厥討論尚或有取

容齋洪氏隨筆曰國朝會要自元豐三百卷之後至崇寧政和間復置局修纂宣和初王黼秉政罷修書五十八所時會要已進一百十卷餘四百卷亦成但局中欲節次覲賞故未及上既有是命局官以謂若朝廷許立限了畢不過三兩月可以投進而黼務悉矯蔡京所為故一切罷之官吏既散

文書皆為棄物矣建炎三年外舅張淵道為太常博士時禮寺典籍散佚亡幾而京師未陷公為宰相言宜遣官往訪故府取見存圖籍悉輦而來以備掌故此若緩而甚急者也宰相不能用其後逆豫竊據鞠為煨燼吁可惜哉

中興會要二百卷

陳氏曰監修晉江梁克家叔子等上乾道六年既進續會要有旨自建炎元年續修止紹興三十二

年九月成書

國朝會要總類五百八十八卷

陳氏曰李心傳所編合三書為一刻於蜀中其板今在國子監

三朝聖政錄十卷

鼂氏曰皇朝富弼上言乞選官置局將三朝典故編成一書即命王洙余靖孫復歐陽修編修分別事類成九十六門

陳氏曰其書初名太平故事凡九十六門每事之後各釋其意至紹興八年右朝議大夫呂源得舊印本刊正增廣名政要釋明策脩上之於朝館閣書目指政要為寶訓非也

三朝寶訓三十卷

陳氏曰翰林學士李淑等撰天聖五年監修國史青社王曾奏乞用唐吳兢貞觀政要故事取三朝聖語政事及臣僚奏對不入正史者別為一書與

國史實錄並行至十年書成詔以實訓為名其後
進讀於邇英今館閣書目以為二十卷富弼所上
者非也乃政要耳

王氏揮麈錄曰仁宗即位方十歲章獻明肅太后
臨朝章獻素多知謀分命儒臣馮章靖元孫宣公
與宋宣獻綬等采摭歷代君臣事迹為觀文覽古
一書祖宗故事為三朝寶訓十卷每卷十事又纂
郊祀儀仗為鹵簿書三十卷詔翰林待詔高克明

等繪畫之極為精妙。叙事於左。令傳母輩。日夕侍上。展玩之。解釋誘進。鏤板於禁中。元豐末。哲宗以九歲登極。或有以其事啓於宣仁聖烈皇后者。亦命取板摹印。倣此為帝學之權輿。分錫近臣及館殿時大父。亦預其賜。明清家因有之。紹興中為秦伯陽所取。

三朝訓鑒圖十卷

陳氏曰。學士李淑。楊偉等修纂。慶歷八年。偉初奉

旨檢討三朝事迹乞與淑共編且乞製序皇祐元年書成頃在莆日有售此書者亟求觀之則已為好事者所得蓋當時御府刻本也卷為一冊凡十事事為一圖飾以青赤亟命工傳錄凡字大小行廣狹設色規模一切從其舊斂衽鋪觀如生慶歷皇祐間目睹聖作明述之盛也按館閣書目載此書云繪采皆闕至續書目乃云得其全未知果當時刻本乎抑亦摹傳也

按三朝寶訓一書直齋書錄解題以為宰相王曾奏請編修成於天聖十年凡三十卷揮麈錄以為章獻命儒臣所修成於天聖初年凡十卷殊不相脗合然揮麈錄所言禁中刻本且有繪圖則似即此三朝訓鑒圖十卷之書然直齋以此書為慶厯皇祐時所修纂則又與揮麈錄所謂仁皇初年傅母輩侍上展玩之語深不合矣當俟考訂精者質之

仁宗政要四十卷

鼂氏曰皇朝張唐英撰

仁皇訓典六卷

陳氏曰翰林侍講范祖禹撰元祐八年經筵所上

凡三百十七條大畧亦用寶訓體

兩朝寶訓二十卷

陳氏曰禮部郎中長樂林希子中編進用天聖故

事也元豐六年表上

神宗寶訓二十卷

鼂氏曰皇朝林處撰處希之姪也剽聞神宗聖政
輒稱記錄分一百門以續五朝寶訓崇寧上於朝
歷代年號并宮殿等名一卷

陳氏曰丞相饒陽李昉明叔在翰苑時所纂

朝制要覽五十卷

陳氏曰屯田郎中宋咸撰此書傳於陸放翁書其
後曰先君會稽公晚歲喜觀間為子弟講論因革

率至夜分會稽公者宰元鈞也其書作於嘉祐中
皆國初故實觀之使人有感焉

景德會計錄六卷

鼂氏曰皇朝丁謂謂之撰謂景德中纂三司戶口
稅賦之入及兵食吏祿之費會計天下每歲出納
贏虧之數書成奏御

陳氏曰謂時為三司使序言歲收兩京十七路帳
籍四萬四百有七日入疾徐事一千五百文移倍

之以李吉甫國計簿賈耽國要圖總其目得四十
列為六卷一戶賦二郡縣三課入四歲用五祿食
六雜記大抵取景德中一年為准

皇祐會計錄六卷

鼂氏曰皇朝田況元鈞撰況兩為三司使謂夏戎
阻命之後增兵比之景德幾一倍加之吏員益繁
經費日侈民力日疲乃約丁謂會計錄以皇祐財
賦所入多於景德而其出又多於所入著成此書

上之庶幾朝廷稽祖宗之舊省浮費以裕斯民云
陳氏曰元鈞倣景德之舊取一歲最中者為準又
為儲運一篇以補其闕

春明退朝錄三卷

陳氏曰龍圖閣學士常山宋敏求次道撰所記多
故實其父宣獻公綬居第在春明坊如鼂氏稱昭
德也

先朝政範一卷

陳氏曰直集賢院徂徠石介守道編進自任將至
悔過凡十二篇

尊號錄一卷

丞相安陸宋庠公序撰大意以為徽號夸詡非古
而我祖宗往往謙遜不居猶願超然遠覽盡屏前
號其愛君以德者歟至神宗遂却不受至於今行
之

輔弼名對四十卷

天禧中前進士劉顏編自漢迄五代為四十門

青社賑濟錄一卷

丞相富文忠公弼青州救荒施行文牘也

元豐問事錄二卷

光祿寺丞李德芻撰德芻邯鄲李淑之子元豐中

為詳定官制檢討文字詔旨所問奏藁錄為此書

官制局紀事一卷

李德芻奉旨編錄置局以來命官等事

中書備對十卷

鼂氏曰皇朝元豐三年畢仲衍承詔編次曰周官
所謂要會者正今日中書所宜有自漢至唐莫知
議此今編成十卷凡一百二十五門附五十八事
李清臣嘗與許將書云備對乃吳正憲公居宰路
以聖問多出意表故令中書掾畢君為之其時預
有畫旨諸司遇取會不許濡滯如此尚歷數年乃
就後多有改革然事亦可槩見也

蔣魏公逸史二十卷

容齋洪氏隨筆曰蔣魏公逸史穎叔所著也多記當時典章文物之舊有數百冊兵火間盡失之其曾孫芾始捃摭遺藁而成此書將以奏御以其副上之太史且板行之傳之天下後世既而不果蔣公在熙寧元祐崇寧時為博聞強識然閱其論述頗有可議恨不及丞相在日與之言大槩辨訂官制之訛誤也

呂申公掌記一卷

陳氏曰丞相申國呂公著晦叔撰在相位所記人材已用未用名姓及事當行已行條目

元祐榮觀集五卷

陳氏曰左朝奉大夫權太學正汪浹撰記元祐六年視學本末并羣臣所上詩賦頌表之類張舜民芸叟為之序

泰陵故事二十卷

陳氏曰不著名氏皆叙宣仁臨朝九年中制誥表章奏議之屬

尊堯錄八卷

陳氏曰延平羅從彥仲素撰從彥師事楊時而李侗又師從彥所謂南劍三先生也從彥當靖康初以為本朝之禍起於熙豐不遵祖宗故實故采四朝事為此錄又李沆寇準王旦王曾杜衍韓琦范仲淹富弼司馬光程顥名輔巨儒十人言行附於

其後未有別錄一卷專載司馬光論王安石陳瓘
論蔡京奏疏欲上之朝不果嘉定中太守劉元濟
得其書奏之且為板行

本朝事實三十卷

陳氏曰右承議郎李伋撰雜錄故事不成條貫統
紀

皇朝治迹統類七十三卷

陳氏曰眉山彭百川叔融撰畧用袁樞通鑑本末

條例為前集四十卷中興後事為後集三十三卷
皇朝事類樞要二百五十卷

陳氏曰蜀人張和卿編集為一百五十門蓋舉子
答策之具也

長樂財賦志十六卷

陳氏曰知漳州長樂何萬一之撰往在鄞學訪同
官薛師雍子然凡案間有書一編大畧述三山一
郡財計而累朝詔令申明沿革甚詳其書雖為一

郡設於天下實關通問所從得薛曰外舅陳止齋
修圖經欲以為財賦一門後緣卷帙多不果入因
借錄之書無標目以意命之曰三山財計本末及
來莆田謂鄭寅子敬道之鄭曰家有何一之長樂
財賦志宣此邪復借觀之良是其間亦微有增損
末又有安撫司一卷併抄錄附益為全書

內治聖鑑二十卷

陳氏曰起居舍人兼嘉王府贊讀清江彭龜年子

壽撰取列聖修身齊家教子訓齊宗室防制外戚
宦官摯御等事以紹熙五年表上之光宗稱善且
曰祖宗家法最善漢唐不及也

高宗聖政草一卷

陳氏曰陸游在隆興初奉詔修高宗聖政草創凡
例多出其手未成而去私篋不敢留藁他日追記
得此錄之而書其後凡二十條

高宗孝宗聖政編要二十卷

陳氏曰高宗聖政五十卷孝宗聖政五十卷乾道淳熙中所修皆有御製序此二帙書坊抄節以備舉子應用之儲也

孝宗聖政十二卷

陳氏曰亦書坊抄節比前為稍詳

按孝宗聖政係陳止齋奉詔擬御製序言起初潛至內禪擬其最凡得六百四十一條為五十卷紹興三年序

會稽和買事宜七卷

陳氏曰浙東帥番陽洪邁景盧提舉常平三山鄭
湜補之集初承平時預買令下守越者無遠慮凡
一路州縣所不受之數悉受之故越之額特重以
匹計者十四萬六千九百居浙東之半人戶百計
規免皆詭為第五等戶而四等以上戶之害日益
甚於是有為畝頭均科之說者帥鄭丙少嘉憲邱
密宗卿張詔君卿頗主之由淳熙十一年以後畧

施行而議者多以剋科五等戶為不便參政李彥
頴秀叔尚書王希呂仲行先後帥越皆言之而王
畫八事尤力會光廟亦以為貽窮貧之害戶部尚
書葉翦叔羽奏乞先減四萬四千餘匹止以十萬
為額而後均敷詔從之仍令侍從集議皆乞關併
詭挾遂詔邁湜措置既畢以施行次第類成此書
時紹熙元年也

劉忠肅救荒錄五卷

陳氏曰王居仁撰淳熙乙未樞密劉珙共父帥江東救荒本末嘉定乙亥真景元刻之漕司以配韓富公青社之編而以劉公行狀謚議附於後

西漢會要七十卷 東漢會要四十卷

武學博士清江徐天麟仲祥撰以二史所載漢家制度典章散於紀傳表者倣唐以來會要體分門編纂其用力勤矣其言范曄志藁為謝儼蠟以覆車劉昭因曄遺緒註而補之夫既曰蠟以覆車安

得復有遺緒蓋未考昭之所著實司馬紹統續漢書志也仲祥乙丑進士世有史學其世父夢莘商老著北盟會編父得之思叔為左氏國紀兄筠孟堅作漢官考皆行於世

漢制叢錄三十三卷

袁夢麟應祥撰以二漢所紀典故分門編類凡二十五門

平陽會四卷

通直郎知平陽縣汪季良子駟撰平陽號難治為
浙東三陽之冠季良治有聲乃以一邑財計自兩
稅而下為二十一篇終於歲會旁通沿革本末大
畧脩矣又為外篇五條如砧基副本催科檢放及
書手除科數之類以為此財用所從出也季良端
明應辰之孫佳士且能吏也得年不永士論惜之

唐昌記二卷

知昌化縣趙希克家撰

錢譜十卷

鼂氏曰右梁顧烜嘗撰錢譜一卷唐張台亦有錢錄兩卷皇朝紹聖間孝美以兩人所纂舛錯增廣成十卷分八品云

貨泉錄一卷

鼂氏曰右皇朝陶岳撰記五代諸侯擅改錢幣之由幽州嶺南福建湖南江南五國

續錢譜十卷

鼂氏曰右皇朝董道撰道之祖嘗得古錢百令道
考次其文譜之以前世帝王世次為序且言梁顧
烜唐封演之譜浸汙蔽固不可用其譜自太昊葛
天氏至堯舜夏商皆有錢幣其穿鑿誕妄至此

泉志十五卷

陳氏曰洪遵景嚴撰記歷代錢寶

浸銅要畧一卷

陳氏曰張甲撰稱德興草澤紹聖元年序蓋膽水

浸鐵成銅之始甲參政子公之祖

治金錄一卷

陳氏曰泉司吏所為也

鄭夾漈通志畧

莆田鄭樵漁仲撰淳熙間經進自序畧曰江淹有言修史之難無出於志誠以志者憲章之所係非老於典故者不能為也不比紀傳紀以年包事傳以事繫年儒學之士皆能為之惟有志難其次莫

如表所以范曄陳壽之徒能為紀傳而不敢作表
志志之大原起於爾雅司馬遷曰書班固曰志蔡
邕曰意華嶠曰典張勅曰錄何法盛曰說餘史並
承班固謂之志皆詳於浮言畧於事實不足以盡
爾雅之義臣今總天下之大學術而條其綱目名
之曰畧凡二十畧百代之憲章學者之能事盡於
此矣其五畧漢唐諸儒所得而聞其十五畧漢唐
諸儒所不得而聞也曰氏族畧六書畧七音畧天

文畧地理畧都邑畧諡畧器服畧樂畧藝文畧校
讎畧圖譜金石畧災祥畧昆蟲草木畧凡十五畧
出臣胸臆不涉漢唐諸儒議論曰禮畧職官畧選
舉畧刑罰畧食貨畧凡前五畧雖本諸前人之典
亦非諸史之文也

按鄭氏此書名之曰通志其該括甚大卷首序論
譏詆前人高自稱許蓋自以為無復遺憾矣然夷
考其書則氏族六書七音等畧考訂詳明議論精

到所謂出臣胸臆非諸儒所得聞者誠是也至於
天文地理器服則失之太簡如古人器服之制度
至詳今止罇壘一二而謂之器服畧可乎若禮及
職官選舉刑罰食貨五者則古今經制甚繁沿革
不一故杜岐公通典之書五者居十之八然杜公
生貞元間故其所記述止於唐天寶今通志既自
為一書則天寶而後宋中興以前皆合陸續銓次
如班固漢書續史記武帝以後可也今通志此五

畧天寶以前則盡寫通典全文畧無增損天寶以後則竟不復陸續又以通典細注稱為已意附其旁而亦無所發明

通志此五畧中所謂臣按云云低一字寫者皆通典細注耳

疎畧如此乃自謂雖本前人之典而亦非諸史之文不亦誣乎夾漈譏司馬子長全用舊文間以里俗采摭未備筆削不遑又譏班孟堅全無學識專事剽竊自高祖至武帝七世盡竊遷書不以為慚至其所自為書則不堪檢點如此然則著述豈易

言哉

又按此書刊本元無卷數止是逐畧分為一二耳
中興四朝藝文志別史類載通志二百卷其後叙
述云中興初鄭樵采歷代史及他書自三皇迄隋
為書曰通志倣遷因為記傳而改表為譜志為畧
則其為書似是節抄刪正歷代之正史如高峻之
小史蘇子由之古史而非此二十畧之書也但二
十畧序文後言於紀傳即其舊文從而損益制誥

書疏寘之別錄唐書五代史本朝大臣所修非微
臣敢議故紀傳及隋若禮樂刑政務存因革故引
而至唐云則亦畧言其作書之意豈彼二百卷者
自為一書亦名之曰通志而於此序附言其意邪
或併二十畧共為一書邪當俟續考

右故事

文獻通考卷二百一

欽定四庫全書

文獻通考卷二百二

鄱陽馬端臨貴與著

經籍考二十九

史職官

漢官儀一卷續補一卷

陳氏曰後漢軍謀校尉汝南應劭仲遠撰按唐志有漢官五卷漢官儀十卷今惟存此一卷載三公

官名及名姓州里而已其全書亡矣李埴季允嘗

續補一卷

漢官典儀一卷 續補一卷

陳氏曰漢衛尉蔡質撰雜記官制及上書謁見禮
式隋志有漢官典職儀式二卷今存一卷李埴亦
補一卷其續者皆出於史中採拾

漢官舊儀三卷

陳氏曰漢議郎東海衛宏敬仲撰或云胡廣按宏

本傳作漢舊儀四篇以載西京雜事不名漢官今此惟三卷而又有漢官之目未知果當時本書否唐志亦無官字舊在儀注類以其載官制為多故著於此

唐六典三十卷

鼂氏曰唐元宗撰李林甫張說等注以三公三師三省九寺五監十二衛等列其職司官佐叙其秩品以擬周禮雖不能悉行於世而諸司遵用殆將

過半觀唐會要請事者往往援據以為實韋述以
為書雖成而竟不行過矣然識者謂自唐虞至周
有六官而無寺監自秦迄陳有寺監而無六官獨
此書兼之故官皆複重也

陳氏曰題御撰李林甫等奉敕注按韋述集賢記
注開元十年起居舍人陸堅被旨修六典上手寫
白麻紙凡六條曰理教禮政刑事典令以類相從
撰錄以進張說以其事委徐堅思之歷年未知所

適又委毋貳余欽韋述始以令式入六司象周禮
六官之制其沿革並入注然用功艱難其後張九
齡又以委咸二十六年奏草上至今在書院亦不
行用今按新書百官志皆取此書即太宗貞觀六
年所定官令也周官六職視周禮六典已有邦土
邦事之殊不可考證唐制內外官與周制迥然不
同而強名六典可乎善乎范太史祖禹之言曰既
有太尉司徒司空而又有尚書省是政出於二也

既有尚書省而又有九寺是政出於三也本朝裕陵好觀六典元豐官制盡用之中書造命門下審覆尚書奉行機事往往留滯上意亦頗以為悔云

中台志十卷

鼂氏曰唐李筌撰起殷周迄隋唐纂輔相邪正之迹分皇王霸亂亡五類以為鑒戒唐相以李林甫陳希烈附皇道筌上元中自表天寶初追以綴名云

元和百司舉要二卷

陳氏曰唐宰相趙郡李吉甫弘憲撰首稱文班八十四司四百六十員武班二十六司一百八十員都計六百四十員末稱京文武官及府縣總三千七百九十九員意者當時實數也

具員故事十卷

陳氏曰唐鳳閣舍人梁載言撰以唐官具員附之歷代事迹蓋後人職林職官分紀之類所從始也

或稱職祖連珠崇文總目又作具員事跡中興書
目惟有七卷三卷缺

官品纂要十卷

陳氏曰唐樂安任戩撰以官品令為主而階職勲
爵隨品具列歷代沿革頗著其要戩舉進士不第
為此書當太和之丁未

御史臺記十二卷

鼂氏曰唐韓琬撰載唐初至開元御史臺中制度

故事以大夫中丞侍御史殿中監察主簿錄事分門載次名氏行事著論一篇叙御史正邪得失進擢誅滅之狀附卷末以為世戒

陳氏曰自唐初迄開元五年御史姓名行事及官制沿革皆詳著之第八卷為琬著傳九卷以後為右臺右臺創於武后廢於中宗歲月蓋不久也末有雜記五十七條

御史臺故事三卷

陳氏曰唐朝集使洺州錄事參軍李構撰

集賢注記二卷

鼂氏曰唐集賢學士韋述撰述在集賢四十年天寶丙申擬置院始末及院中故事修撰書史之次及孝明時學士名氏頗善叙事

南宮故事一卷

鼂氏曰不題撰人韋述云開元中劉鄭蘭撰劉儒者無著述方

翰林志一卷

鼂氏曰唐李肇撰纂唐世翰林院中供奉儀則制誥書詔之式其後云睿聖文武皇帝裂海岱十二州為三道之歲蓋憲宗元和十四年也

承旨學士院記一卷

陳氏曰唐承旨河南元稹微之撰載承旨姓名自貞元二十一年鄭絪至元和十五年杜元穎并稹為十二人末又有李德裕李紳韋處厚三人蓋後

人所益也

翰林學士記一卷

陳氏曰唐侍講學士萬年韋處厚德載撰

翰林院故事一卷

陳氏曰唐學士京兆韋執誼撰

翰林學士院舊規一卷

陳氏曰唐學士馮翊楊鉅文碩撰雜記院中事例

及文書格式其祠祭祀版社稷宗廟上至天地用

伏惟尚享岳瀆而降只曰尚享此例今人皆莫之知則施之尊卑無別矣鉅宰相收之子其為學士在昭宗時

重修翰林壁記一卷

陳氏曰唐學士丁居晦撰開元二年也所記姓名迄於咸通而獨無天寶大歷學士為不可曉

翰林盛事一卷

陳氏曰唐張著撰記唐朝儒臣美事凡三十八人

史館故事錄三卷

鼂氏曰不題撰人姓名記史館雜分六門迄於五代李獻臣以為後周史官所著

陳氏曰六門曰叙事史例編修直筆曲筆而終之以雜錄末稱皇朝廣訓則是周朝史官也

翰林續志二卷

鼂氏曰皇朝蘇易簡撰易簡在北門最承太宗睭遇錄元和以後至國朝翰林故事以續李肇之書

金坡遺事三卷

鼂氏曰皇朝錢惟演載國朝禁林儀式事迹并學士名氏文元公述真宗禮待儒臣三事附於卷末陳氏曰題名自建隆至天聖四年凡四十七人自開元而下合三百一十五人其他典故視前記詳矣

翰林雜志一卷

鼂氏曰不題撰人輯唐書韋執誼故事元稹承旨

壁記韋來微新樓記杜元穎監院使記鄭璘視草
亭記并詩李宗諤題名記為一篇或云蘇易簡子
耆采其父翰林續志所遺附益之

陳氏曰蘇耆以其父遭遇恩禮之盛續於其後名
次續志

別書金坡遺事一卷

陳氏曰學士澶淵鼂迥昭遠撰因錢惟演寄示遺
事別書真宗待遇恩禮三則於其後

翰苑雜記一卷

陳氏曰學士饒陽李宗諤昌武撰

掖垣叢志二卷

鼂氏曰皇朝宋庠撰景祐中李宗諤始取國初掌
誥名氏刻之於石自為紀序庠因之成此書王禹
玉頗譏其疎畧裴庭裕載舍人上事知印宰相歷
角至今傳之為故事而庠書闕焉時為三字

掖垣續志一卷

鼂氏曰不詳撰人續宋庠書迄元祐六年十一月
陳軒試中書舍人

御史臺記五卷

陳氏曰不知何人作記本朝御史臺事至崇觀間
嘉祐御史臺記五十卷

鼂氏曰右皇朝馮潔已撰御史臺有記始於武后
時姚庭筠其後韓琬韋述嗣有紀著嘉祐中王疇
命潔已續之乃上自太祖建隆之元迄於嘉祐之

末凡一百四年分門載其名氏行事凡三百餘人
潔已拯之子也為叙傳兩篇述其父事且自叙立
朝本末云與呂獻可傳欽之趙閱道相善而鄙韓
玉汝周孟陽亦可概見其為人也

新御史臺記

鼂氏曰右皇朝宋聖寵編崇寧中聖寵為察官續
韓琬書咸用其規式所異者不為諸人立傳於儀
制勅令格式為詳後人續至紹興九年

御史臺彈奏格一卷

鼂氏曰右政和中御史中丞蔣猷奏乞委屬官李
彌大將本臺制勅令格式彈奏事件編成格目六
月書成上之

陳氏宰相拜罷錄一卷

鼂氏曰皇朝陳繹奉詔編起范質止曾公亮所載
拜罷之由與實錄不同元祐史臣謂繹多出已意

陳氏樞府拜罷錄一卷

鼂氏曰陳繹編起魏仁浦止宋綬

宰輔拜罷錄二十四卷

陳氏曰史館修撰范冲元長等撰起建隆元年止
紹興六年宰相自范質至張浚執政自趙普至折
彥質名記除授年月訓詞亦畧叙在位本末於后
執政拜罷錄十卷

鼂氏曰不題撰人自建隆元年止紹興九年按國
朝以樞密院及參知政事為執政改官制後以左

右丞兩省侍郎并密院為執政建炎三年後復用
舊制云

國朝輔相年表一卷 續一卷

陳氏曰同知太常禮院開封陳繹和叔撰自建隆
庚申迄治平丙午續自丁未迄紹興十四年稱臣
易記而不著姓當是李易也時方自給事中奉祠
其曰私題臣易之次者其書蓋未必上而私續之
耳自後接於嘉定則後人所益也

百官公卿表一百四十五卷

書錄解題作十五卷

鼂氏曰皇朝司馬光君實等撰熙寧中光以翰林學士兼史官修撰建議欲據國史旁采異聞叙宋興以來百官除拜效漢書作表以便卹覽詔許之光請宋敏求同修及敏求卒又請趙彥若繼之歷十二年書成

公自序曰唐初職事官有六省一臺九寺三監十六衛十六府之屬其外又有勲官散官勲官以賞

戰多散官以褒勤舊故必折馘執俘然後賜勲積
資累考然後進階以其不可妄得故當時以為榮
及高宗東封武后預政欲求媚於衆始有汎階自
是品秩浸訛朱紫日繁矣肅宗之後四方糜沸兵
革不息財力屈竭勲官不足以勸武功府庫不足
以募戰士遂并職事官通用為賞不復選材無所
愛吝將帥出征者皆給空名告身自開府至郎將
聽臨事注名後又聽以信牒授人有至異姓王者

於是金帛重而官爵輕矣或以大將軍告身纔易
一醉其濫如此重以藩方跋扈朝廷畏之窮極褒
寵苟求姑息遂有朝編卒伍暮擁節旄夕解提衣
旦紆公袞者矣流及五代等袞益紊三公端揆之
貴施於軍校衣紫執象之榮被於胥史名器之亂
無此為甚大宋受命承其餘弊方綱紀大基未暇
釐正故臺省寺監衛率之官止以辨班列之崇卑
制廩祿之厚薄多無職業其所謂官者乃古之爵

也所謂差遣者乃古之官也自餘功臣檢校官散
官階勲爵邑徒為繁文人不復貴凡朝廷所以鼓
舞羣倫緝熙庶績者曰官曰差遣曰職而已於三
者之中復有名同實異交錯難知又遷徙去來常
無虛日欲觀其大畧故自建隆以來文官知雜御
史以上武官閣門使以上內臣押班以上遷除黜
免刪其繁冗存其要實以倫類相從以先後相次
為百官公卿表云

陳氏曰此書本入職官類以稽古錄序所謂建隆
接熙寧臣又著之於百官表即此書蓋與通鑑相
與表裏故著之編年類纂志有一百四十二卷未
詳

巽岩李氏序曰司馬光以熙寧二年建議請撰宋
興以來百官公卿表元豐四年表成凡十卷詔送
編修院世莫知其書何如也按光集有百官公卿
表總序文官知雜御史以上武臣閣門使以上內

臣押班以上其遷出咸表見之初不紀其卷第某家藏舊書有所謂百官公卿表者七卷宰相參知政事樞密使副為一卷三師三公左右僕射東宮三師三少賓客為一卷使相宣徽節度留後觀察為一卷尚書丞郎給諫常侍為一卷知開封府三司使學士舍人御史中丞為一卷觀文資政端明樞密侍講讀學士為一卷十二衛上將軍六軍統軍為一卷他官皆止天禧惟宰相執政盡熙寧疑

此表則光等所修也然卷第比實錄所載尚缺其三倫類往往顛倒紛錯而總序所稱閣門使及押班以上皆絕不見豈三卷所缺即此表者而傳寫偶失之歟若然則他官除拜俱當以元豐為限矣不應自天禧以來遽絕筆但詳於宰相執政也且當時修此表歷十二年乃成其久如是其疎畧顧如是是必不然當某家舊藏不得其純全耳某能薄不堪世用頗願盡力於史學而本朝故事尤切

欣慕某既不自料故追繼光作將以昭明祖宗之盛德大業使衆說咸會於一不敢鑿空架虛熒惑視聽固當事謹其月日如古春秋乃可傳信彼百官沿革公卿除拜皆事之最大者也年表又安可缺因取舊七卷亟整治之續編其年至宣和止元符以前皆從實錄治平而上又參諸正史元符以後不免憑所傳聞國書既非人間通有辛苦求得之脫簡誤字絕無他本可校於先後次序諒多

牴牾但憑所傳聞則宣和距元符二十五六年茲
不詳此皆某之罪也改而正諸必有所待年表舊
止七卷卷第不均今釐析之與某所續編者總一
百四十二卷凡所增益倫類具之目錄其故事則
當別見續紀此不重列

按此序則溫公本書止十卷巽岩續編推而廣之
為一百四十二卷鼂氏所言乃巽岩續書非溫公
本書也陳氏以為未詳者是未見巽岩之書然又

以溫公之書為十五卷則不知其何所本也

鼂氏在巽

岩之前安得見其書所謂一百四十五卷者決非巽岩之書也

職林二十卷

陳氏曰集賢院學士錢塘楊侃撰咸平二年所序

有胡昉者明道二年作後序增益事實七百四十

五條而以新續標之侃端拱進士晚為知制誥避

真宗舊諱更名大雅歐陽公其壻也集中有墓誌

輔弼名對四十卷 目錄一卷

晁氏曰皇朝劉顔撰纂西漢迄五代羣臣應對之名者汲黯有天子置公卿輔弼之臣寧令從諛承意陷主不諛之言顔取以名其書天聖初馮元為侍講上之顔常為令坐事免由是詔復其官

職官分紀五十卷

陳氏曰富春孫逢吉彥同撰大抵本職林而增廣之條例精密事實詳備矣秦少游序之元祐七年也

官制學制名一卷

陳氏曰司馬光撰

唐職林三十卷

陳氏曰石埭尉維揚馬永錫明叟撰以唐六典為主而附以新史所載事實頗采傳記歌詩之屬政和乙未天台左譽序

朝集院須知一卷

陳氏曰無名氏錄承平時京朝官得替回朝見禮

式

皇宋館閣五卷

陳氏曰不著名氏所記止於元祐中興館閣書目
云秘閣校理宋匪躬撰又云共八門元十五卷存
十一卷今本止五卷不見門類前三卷又混而為
一意未必全書也

蓬山志五卷

陳氏曰秘書少監劔川羅畸疇老撰凡十五門崇

寧四年序

麟臺故事五卷

鼂氏曰皇朝程俱撰紹興初復館職首入館纂集舊聞成十二篇予所藏書斷自南渡之前獨此書以載官制後事為詳故錄之

陳氏曰俱在承平時凡三八省故其見聞為詳

中興館閣錄十卷 續十卷

陳氏曰秘書監天台陳騭叔進撰淳熙中騭長蓬

山與同僚錄建炎以來事為此書李燾仁父為序
續錄者後人因舊文增附之耳

巽岩李氏序曰上世官修其方故物不坻伏後世
弗安厥官其方莫修職業因以放失夫方云者書
也究其本原事迹及朝夕所當思營者悉書之法
術具焉使居是官者奉以周旋雖百世可考爾周
官三百六十官各有書小行人適四方則物為一
書多至五書蓋古之人將有行也舉必及三惟始

衷終依據審諦則其設施斯可傳久六龍駐蹕臨
安踰四十年三省樞密院制度尚稽復舊惟三館
秘閣歸然傑出非百司比自唐開元韋述所集記
注元祐間宋宣獻之孫匪躬作館閣錄紹興改元
程俱致道作麟臺故事宋氏皆祖韋氏而程氏故
事并國初他則多闕蓋未知其有宋錄也惜最後
四卷俄空焉余屢蒐采弗獲欲補又弗暇每每太
息今所編集第斷自建炎以來凡物巨細靡有脫

遺視程氏誠當且密官修其方行古道者不當如是耶昏忘倦游喜見此書乃援筆為之序

翰林羣書三卷 翰林遺事一卷

陳氏曰學士承旨番陽洪遵景嚴自李肇而下十
一家及年表中興後題名共為一書而以其所錄
遺事附其末總為三卷遺事錄諸書所未及者洪
氏父子兄弟四人入翰苑

續史館故事一卷

陳氏曰著作佐郎曲阿洪興祖慶善撰記國朝史館事迹以續舊編

祖宗官制舊典三卷

陳氏曰直龍圖閣東萊蔡惇元道撰大畧以為元豐用官階寄祿雖號正名而流品混淆爵位輕濫故以祖宗舊典與新制參稽互考而論其得失元道文忠公參政齊之姪孫而翰林學士延慶之子渡江卒於涪陵尹和靖惇嘗題其墓

官制舊典正誤一卷

陳氏曰無名氏

國朝官制沿革一卷

陳氏曰黃琮元禮撰

職官記一卷

陳氏曰大理少卿蜀人張縝季長撰專載新舊遷轉之異亦以寄祿為未然也以上三家皆附蔡氏書後

官制新典十卷

陳氏曰熊克撰其書以元豐新制為主而元祐之畧加通變崇政之恣為紛更皆具列焉

聖朝職畧二十卷

陳氏曰熊克撰倣馬永錫唐職林考其廢置因革亦頗采故事摘舊制誥中語附焉其書猶草創未成蓋應用之具也

續百官公卿表二十卷 質疑十卷

陳氏曰兵部尚書永嘉蔡幼學行之撰續溫公舊書起熙寧至靖康質疑者考異也

職源五十卷

陳氏曰大理司直金華王益之行甫撰亦簡牘應用之書也而專以今日見行官制為主蓋中興以後於舊制多所併省故也

元輔表一卷

陳氏曰龔頤正撰專錄宰相不及執政

漢官考六卷

陳氏曰知金州清江徐筠孟堅撰以百官表官制為主而紀傳及注家所載皆輯而錄之

漢官總錄十卷

陳氏曰王益之撰大較亦如前書

縣法一卷

陳氏曰北京留守溫陵呂惠卿吉甫撰曰法令詞訟刑獄簿歷催科給納灾傷盜賊勸課教化凡十

門為縣之法備於此矣雖古今事殊而大體不能越也惠卿小人之雄於才術固優然法令居首而教化乃居其末不曰俗吏而謂之何哉

縣務綱目二十卷

陳氏曰贛陽劉鵬撰凡四十四門四百七十餘事其說不止於作縣而事關縣務者為多焉元符庚辰序

作邑自箴十卷

欽定四庫全書

文獻通考
卷二百二

三

陳氏曰李元弼持國撰政和丁酉序

中興百官題名五十卷

陳氏曰監察御史臨川何異同叔撰首卷為宰輔
拜罷錄餘以次列之刻浙漕司其後以時增附渡
江之初庶務草創諸司間有不可考者多缺之

齊齋臺諫論二卷

陳氏曰尚書雲川倪思正父撰嘉定初更化矯韓
氏用事之弊於是為論三篇言為之鷹犬者罪在

臺諫已而其弊自若也則又為牘論六篇言其情
狀益精詳凡為臺諫之所以得所以失者至矣盡
矣

金國官制一卷

陳氏曰金世宗大定年所攷仿取唐及本朝舊制
以文其官爵之制

文獻通考卷二百二

欽定四庫全書

史部

文獻通考卷二百

三五

詳校官內閣學士

臣瑞保

編修

臣程嘉謨覆勘

覆校官中書

臣孫希旦

校對官中書

臣王彝憲

謄錄監生

臣戴祖覃

謄錄監生

臣戴朝琛

欽定四庫全書

文獻通考卷二百三

鄱陽馬端臨貴與著

經籍考三十

史職官刑法

歷代宰相年表三十四卷

李燾仁甫撰其自序略曰古之所謂相者一而已

初未嘗使他人參貳乎其間堯相舜舜相禹禹相

臯陶臯陶既沒乃相益湯相伊尹傳所謂仲虺為
湯左相者不足信也周家並建三公而一公實兼
冢宰故旦奭夾輔成王而誕保文武受命者專屬
之旦旦歸於豐奭乃專政蓋其名三公其實一相
耳自秦以降名實浸以兩失間有瓌偉絕特負賢
相之稱功烈赫然著見於一時者亦必得君之專
歷年之久而莫或參貳之故也權出於一而莫或
參貳之雖姦雄或得以肆其惡懷竊天下傾國敗

家不可禁遏然而一相之任終不可分者唐虞夏
商之成法也彼徒見趙高王莽曹操司馬懿其禍
如此之酷也而不察夫帝王之所以隆盛其為利
蓋亦博哉不能還治其本而反疑其末並列兼制
使相牽引而相遂失其職矣夫任相不獲其利而
蒙其禍是君之不明非相之權果不可使出於一
也既奪其職分其權則所謂相者特一大有司耳
其何以總百官治萬事而亮天工邪凡相取其德

耳故曰惟尹躬暨湯咸有一德而舜禹皋陶之胥
命必孜孜以德為言彼誠知所本者歟本之不知
則其選用益雜而多端矣選用雜而多端故其稱
號亦顛倒錯亂無有定制或居其位而不得聞其
政或當軸秉鈞而身乃為他官名實糾紛賢不肖
溷淆其多或至十三四人而其少猶不下四五輩
古所謂相寧若此乎然而治亂安危所係今猶古
也其所以得相及所以失相者要不可不知按諸

舊史惟前漢及唐頗有譜牒其他率皆不具脫略
抵牾迷失本真乃旁搜遠取推究前後悉用司馬
遷經緯之法追為年表起漢元訖周顯德昔之參
機務執樞要者莫不咸在事有本末附見於下否
則略之使其人與其官皆相傳而不絕觀宰相之
出處進退何如而天下安危治亂在目中英其足
以補前代之缺文揭當今之遠鑑乎合一千五百
三十四年離為三十四卷

天禧以來御史年表

李燾仁甫撰其自序曰御史法官也其責不專於言而天禧選用則與諫官俱任言責臺雖有等級也而義所當擊則卑者亦得徑行其權勢氣力又出諫官上祖宗之聖算神術備矣今亦斷自天禧以來取丞雜三院姓名悉列之表若其人必天子自擇而宰相優容之乃能有濟猶諫官也

天禧以來諫官年表

李燾仁甫撰其自序略曰古者自公卿大夫士至
於工商莫不皆有言責輻輳並進而天子斟酌焉
未嘗以言責專付一官以言責專付一官則由漢
武帝失之武帝誠不喜諫者初置諫大夫猶未限
負東京循舊弗改後乃寢微晉洎江表絕不復置
拓跋魏復置其員亦不可知高齊緣孝經之文始
有七人之限夫以天下之衆而敢言者才七人尚
足謂治邪恭惟祖宗明目達聰協於虞舜任言責

者不一天禧別置諫院禮秩優異他官莫擬崇廣
言路諫官御史權勢氣力乃與宰相等蓋當時所
用諫官御史必取天下第一流非學術才行俱備
為一世所高者莫在此位或誤選試旋加汰斥言
而當者曾不十年徑登宰輔其名迹皆可考見嗚
呼盛哉今斷自天禧置院以來作諫官年表并列
古今之變為二說以附著之其一曰諫官必天子
自擇而宰相勿與其二曰宰相雖不得與擇諫官

必優容之乃克有濟

右職官

律文十二卷 音義一卷

陳氏曰自魏李悝漢蕭何以來更三國六朝隋唐
因革損益備矣本朝天聖中孫奭等撰音義自名
例至斷獄歷代異名皆著之

唐令三十卷 式二十卷

陳氏曰唐開元宋璟蘇頌盧從愿等所刪定藝文

志卷數同更同光天福校定至本朝淳化中右贊
善大夫潘憲著作郎王洙校勘其篇目條例頗與
今見行令式有不同者

南豐曾氏序曰唐令三十篇以常員定職官之任
以府衛設師徒之備以口分永業為授田之法以
租庸調為歛財役民之制雖未及三代之政然亦
庶幾乎先王之意矣讀其書嘉其制度有庶幾乎
古者而惜其不復行也故綴其大要可記者論之

於此焉

刑統三十卷

龜氏曰皇朝竇儀以尚書判大理寺與法官蘇曉
奚嶼張希護等修定古者議事以制使民不知所
爭也後世鑄刑書使民知所避也雖若不同所以
為民之意則一然議事以制者委重於人鑄刑書
者委重於法委重於人則上之人將輕重由心以
虐其下委重於法則下之人將徵於書以慢其上

其為失也亦均要之以人行法不使偏重然後為得耳

陳氏曰初范質既相周建議律條繁廣輕重無據特詔詳定弼大周刑統凡二十一卷至是重加詳定建隆四年頒行

金科易覽三卷

鼂氏曰崇文總目有唐趙綽金科易覽一卷田氏書目有蕭緒金科易覽三卷當是綽初撰一卷緒

刪改析之為三爾

疑獄一卷

鼂氏曰晉和凝撰纂史傳決疑獄事其上卷凝書
也下中卷凝子嶠所續

天聖編勅三十卷

鼂氏曰天聖中宋庠龐籍受詔改修唐令參以今
制而成凡二十一門官品一戶二祠三選舉四考
課五軍防六衣服七儀制八鹵簿九公式十田十

一賦十二倉庫十三廩牧十四關市十五捕亡十六疾醫十七獄官十八營繕十九喪葬二十雜二

十一

斷例四卷 元豐斷例六卷

鼂氏曰皇朝王安石執政以後士大夫頗重意律令此熙豐紹聖中法寺決獄比其六卷則元豐中法寺所斷罪節文也

刑名斷例十卷

陳氏曰不著名氏以刑統勅令總為一書惜猶未
備也

嘉祐驛令三卷

陳氏曰三司使梁國張方平安道等修定前一卷
為條貫勅後二卷為則例令官吏幫支驛券衙官
僉從之類皆據此也

元豐廣案二百卷

龜氏曰皇朝元豐初置新科明法或類其所試成

此書

元豐刑部叙法通用一卷

陳氏曰末載申明至紹興淳熙以後

諸路將官通用勅二十卷

龜氏曰皇朝崇寧中修

刑統賦兩卷

龜氏曰皇朝傅霖撰或人為之注

決獄龜鑑二十卷

鼂氏曰皇朝鄭克編次五代和凝有疑獄集近時趙全有疑獄事類皆未詳盡因增廣之依劉向晏子春秋舉其綱要為之目錄分二十門

陳氏曰克因和氏之書分二十門推廣之凡二百七十六條三百九十五事起鄭子產迄本朝

律心四卷

鼂氏曰未詳撰人纂刑統綱要也

宣和軍馬司勅十三卷 令一卷

陳氏曰宣和時所修

紹興勅十三卷 令五十卷 格三十卷 式三十卷

政和以後赦十五卷

鼂氏曰皇朝張守等紹興中被旨編修

紹興刑統申明一卷

陳氏曰開寶以來累朝訂正與刑統並行者

慶元勅十二卷 令五十卷 格三十卷 式三十卷

目錄一百二十二卷 隨勅申明十二卷 總二百五

十六卷

陳氏曰丞相豫章京鏜仲遠等慶元四年表上國朝自建隆以來世有編勅每修定號為新書中興至此凡三修矣其有續降指揮謂之後勅以待他時修入云

紹興貢舉法五十卷

陳氏曰丞相萬俟卨等紹興二十六年表上

紹興監學法二十六卷 目錄二十五卷 申明七卷

對修釐正條法四卷共六十二卷

陳氏曰宰相秦檜等紹興十三年表上

嘉泰條法事類八十卷

陳氏曰天台謝深甫子肅等嘉泰二年表上初吏部七司有條法總類淳熙新書既成孝宗詔倣七司體分門修纂別為一書以事類為名至是以慶元新書修定放降此書便於檢閱引用惜乎不併及刑統也

嘉定吏部條法總類五十卷

陳氏曰嘉定中以開禧重修七司法并慶元泛行法在京通用法大宗正司法參定凡改正四百六十餘條視淳熙總類增多十卷七年二月放行役法撮要一百八十九卷

陳氏曰提舉編條宰相京鏜等慶元六年上自紹興十七年正月以後至慶元五年七月以前為五十五門又八十二小門門為一卷外為參詳目錄

等卷雖多而文甚少其書於州縣差役極便於引
用

右刑法

文獻通考卷第二百三